

奏定試辦直隸公債票章程摺



奏爲餉項竭蹶籌備爲難擬試辦直隸公債票酌訂章程繕具清單恭

摺仰祈

聖鑒事竊維現在財政支絀京外畧同一旦欲驟集鉅金含貸款外別無
良策惟募集洋債利息輕重常受挾持鎊價漲落復多虧損查外洋
各國遇有軍國要需率皆臨時募債不分本國外國而踴躍輸將常
逾定額固由國民急公効義使然而最要關鍵尤在上下相孚絕不
失信中國歷來辦理公債半由官吏不務遠圖鮮克踐言以致民間
公債輒多觀望不前卽或勉集鉅費亦率視爲報効不敢希冀償還
祇求取辦一時而於國民維繫之機相去甚遠利國便民之政轉爲
誤國病民之階臣誠私心痛之今欲開募債票宜自公家嚴守信實
俾民間便利通行方足以挽澆風召天下然示信之道非可空言又
宜預籌的款備償本息無論何項不得挪用又准其交納本省庫款

關稅各項隨處皆可兌用信如四時令如流水既易籌集尤便推行在國家無利源外溢之虞在商民得子母流通之益維挽民心恢張國力皆在此舉經臣詳酌中外章程以取信便用爲宗旨就本省籌款歲可得銀一百二十萬兩計可貸公債銀四百八十萬兩第一年按七釐付息逐年遞加一釐分六年還清以所籌之的款備付本息有盈無絀其期限數目章程暨籌定款項另繕清單恭呈

御覽抑臣更有請者此事係屬創行計在久遠一或蹉跌繼後爲難中國積習往往始事者備極艱辛而當新舊代易之交輒鮮後先規隨之美不以紛易定章爲才卽以推卸責任爲事號令不行官民不信斷由於此此項公債票如蒙

俞允試辦擬請

降旨作爲永遠定案並責成臣暨布政使鹽運使並繼任之督臣等倘有

違改定章失信於民者照誤國病民論予以應得之罪庶天下士庶
曉然知

朝廷於公債一項實力信行斷無愆改方足以裨助國用收集利權愚昧
之見是否有當理合恭摺具陳伏乞

皇太后

皇上聖鑒訓示謹

奏

光緒三十年十二月十八日奉

上諭袁世凱奏擬試辦直隸公債票一摺外洋各國遇有軍國要需臨時
募債無不聞風踴躍獨中國辦理公債輒多觀望不前良由官吏不能
踐言民信未孚之所致茲據該督奏稱開募債票以取信便用爲宗旨
洵爲扼要所陳籌有的款按年付息分年還本發給票據准其交納本

省官款關稅各項並隨時皆可兌用擬具章程尙屬周妥着卽准其試辦仍責成直隸總督及藩運兩司無論現任接任各員一體認真經理實力信行經此次奏准之後作爲永遠定案斷無改易倘該官吏違章失信仍蹈前轍或啓弊端定行從嚴治罪決不姑寬欽此

御覽

謹將擬訂貸還公債期限數目章程及籌定款項繕具清單恭呈

計開

貸還公債期限數目

一直隸公債共募集銀四百八十萬兩

光緒三十一年二月初一日第一期收銀一百二十萬兩

光緒三十一年四月初一日第二期收銀一百二十萬兩

光緒三十一年六月初一日第三期收銀一百二十萬兩

光緒三十一年八月初一日第四期收銀一百二十萬兩

一前項公債共銀四百八十萬兩分六年還本第一年七釐行息第

二年八釐行息以後每年加一釐至第六年還清爲止

光緒三十二年第一年應共還本銀八十萬兩隨付七釐息銀三

十三萬六千兩

光緒三十三年第二年應共還本銀八十萬兩隨付八釐息銀三十二萬兩

光緒三十四年第三年應共還本銀八十萬兩隨付九釐息銀二十八萬八千兩

光緒三十五年第四年應共還本銀八十萬兩隨付一分息銀二十四萬兩

光緒三十六年第五年應共還本銀八十萬兩隨付一分一釐息銀十七萬六千兩

光緒三十七年第六年應共還本銀八十萬兩隨付一分二釐息銀九萬六千兩

以上六年共還本銀四百八十萬兩

息銀一百四十五萬六千兩

貸還公債章程

一此項公債票每大票庫平足銀或行平化寶銀一百兩整每小票庫平足銀或行平化寶銀十兩整各註取本期限每票主一人按甲乙丙丁戊己分號列收

一由藩司運司蓋用印信

一由天津官銀號匯總收發撥兌

一凡本省地丁錢糧關稅釐金鹽課捐款均可以庫平足色期滿之票交納並將本期內應得利息加算均由承收署局向天津銀號兌現

一各地方官分局員均得以此期滿票解本管庫局統由天津銀號兌現

一此項公票作爲現銀按本有平色兌收不許留難加索

一如在內地及他埠不便回天津銀號取用本息可以期滿之票在官銀號指定代收局號兌取現銀其在本省地方可向地方官衙門及籌款分局取現該署局卽用以抵丁糧稅捐正款解庫

一凡在天津各票主准其按三箇月赴銀號支息一次卽在票上註明支數

一此項公票無論何人均准其轉售轉兌認票不認人

一收存公票在五萬兩以上者准其在每年十二月初一日赴官銀號查驗備付款項如收存公票不及五萬可約集各票主湊成五萬兩公舉一人驗票後赴查

一此項公票如經手大小官員差役不遵定章有留難侵蝕等情弊一經查實官員叅革差役監禁十年仍將侵蝕之款加一倍追罰

還公債本息的款


一直隸藩庫提集中飽等項每年銀三十萬兩

一長蘆運庫新增鹽利每年銀三十五萬兩

一永平七屬鹽利每年銀十五萬兩

一直隸銀元局餘利每年銀四十萬兩

以上每年共銀一百二十萬兩專備還債之需此外無論何項
緊急用款不准挪移動用合併聲明



再順直賑捐一人勸集數在一萬二千兩者照尋常勞績請獎六萬兩以上者照異常勞績請獎歷經蒙

恩允准在案此次勸募公債事係創始經理尤難全在勸募之人竭力設法方可集成鉅款應請援照勸集賑捐請獎成案辦理以廣招徠理合附片陳請伏乞

聖鑒訓示謹

奏

光緒三十年十二月十八日奉

硃批戶部知道欽此

